

## Lambat Ministries, Inc.

### Kabataang Pilipino: Pag-asa o Problema ng Bayan?

By: Conrad Jun Tolosa

#### 1003. Ang Pinagmulan Ng Pressure Sa Buhay Ng Tao

Ang pressures ng tao ay may pinanggalingan subalit upang maunawaan ito ng ating mga kabataan kailangang balikan muna natin ang pasimula.

Ang tao ay nilikha ng Diyos para sa Kanyang layunin. Ang ibig sabihin nito ay may inihandang layunin o gawain ang Diyos para sa tao - ito *ay ang sambahin at paglingkuran ang Diyos.* Maliwanag sa isipan ng tao na ang pagsamba sa Diyos ay ang pagbibigay ng papuri sa mga kamangha-manghang katangian ng Diyos at sa Kanyang mga kahanga-hangang gawa; at ang paglilingkod sa Diyos ay ang pagsasakatuparan o pagsunod sa tatlong gawain na inutos Niya sa tao: 1) Maging mabunga at magparami para punuin ang mundo, 2) Lupigin ang lupa (bungkalin at pagyamanin), at 3) Pamahalaan ang mga isda, ibon at lahat ng uri ng mga hayop.

Likas sa tao na isapamuhay ang mga layuning ito ng Diyos; naging natural sa tao ang sumamba at maglingkod sa Diyos. Nauunawaan niya na ang pagsasagawa ng utos ng Diyos ang nakapagdudulot sa kanya ng kaligayahan at katagumpayan sa buhay.

Matapos likhain ng Diyos ang tao, inilagay Niya ang tao sa Hardin ng Eden upang bungkalin at pagyamanin ito. Ganito ang sinabi ng Diyos kay Adan, *Maaari mong kainin ang kahit na anong bunga ng puno na nasa Hardin, maliban lamang sa bunga ng puno ng pagkaalam ng mabuti at masama. Sa oras na kainin mo ito, tiyak na mamamatay ka.*

Sa Hardin ng Eden kung nasaan ang tao ay may isang nilalang na kumontra sa salita ng Diyos – ang ahas. Ito ang sinabi ng ahas kay Eba, *Hindi kayo mamamatay, bagkos ay magiging katulad kayo ng Diyos na alam ang mabuti at ang masama.* Sa pagkakataong iyon, kinailangan ng tao na magdesisyon, *Sino ang kanyang paniniwalaan?* Hindi nagtiwala ang tao sa salita ng Diyos. Bagkos, ang kanilang pinaniwalaan ay ang kasinungalingan na sinabi ng ahas.

Matapos kainin ng tao ang ipinagbawal na prutas, dinanas ng tao ang kamatayang spiritual - - ang pagkahiwalay ng Espiritu ng Diyos sa tao ng oras ding iyon. Ibig sabihin, nagdilim ang puso't isipan ng tao.

Bunga rin ng kasalanan ang paglabo ng pang-unawa ng tao patungkol sa kanyang kaligayahan na nakasalalay sa pagkakaroon ng tamang relasyon sa Diyos at sa pagsasapamuhay ng layunin na ipinagkaloob sa kanya ng Diyos. Hinangad ng tao na palitan ang kaligayahan ng buhay sa mga bagay na labas sa kalooban ng Diyos o sa mga bagay na hindi kailanman makapagdudulot ng kasiyahan sa kanyang kaluluwa.

Ang tinatawag na *pressures in life* ay bunga ng pagtalikod ng tao sa Diyos. Sa halip na hanapin niya ang kaligayahan at kahulugan ng buhay sa Diyos, kung saan-saan siya bumabaling.

Sa pagpapatupad sa utos ng Diyos na maging mabunga, magparami at punuin ang mundo bilang mag-asawa ay nauwi sa sexual pleasure kaya ang teenager na walang pagpipigil sa sarili ay nabubuntis na bunga ng paghihiwalay ng pleasures sa kalooban ng Diyos.

Kapag hindi masumpungan ang pleasure galing sa sex dahil laging basted, o walang pambayad sa panandaliang kasiyahan na pre-presure ang sarili na bumaling na lang sa paninigarilyo, pag-inom ng alak, pagdodroga, pagsusugal o pagbabarkada.

Sa pagpapatupad sa utos ng Diyos na bungkalin at pagyamanin ang lupa - na may kasamang pagbabanat ng buto, o pagtrabaho - ang mabuti at matinong gawain kapag kulang ang suweldo ay madalas nasasamahan ng pangungupit, pangungurakot, pagnanakaw, pagbebenta ng illegal drugs o pag-aahente sa jueteng.

Sa pagpapatupad sa utos ng Diyos na pamahalaan ang mga ibon, isda at lahat ng hayop – na may kasamang pagtuturo at pagtre-training, ito ay napalitan ng pagnanasang manakop ng kapwa tao, sapagkat naging mailap o mabangis ang mga ibon, isda at hayop sa lupa dahil sa kasalanan at sa sumpang ginawad ng Diyos sa lupa.

In summary: Matindi ang mga naging epekto ng pagkahulog sa kasalanan ng tao.

<i>Original Man</i>	<i>Fallen Man</i>
Hangarin ang Makadiyos na Relasyon	Hangarin ang Pakikipagtalik
Hangarin ang Mabungang Buhay	Hangarin ang Kayamanan
Maglaan ng Pamumuno	Maghangad na Sundin
Sambahin ang Diyos	Sambahin ang Sarili
Paglingkuran ang Diyos	Paglingkuran ang Sarili

Maliwanag na ang pressures in life ng tao maging kabataan man o matanda ay dahil sa kasalanan na pagsunod sa pita ng kanyang laman, paghangad ng bawat makita at magustuhan, at ang sumikat at hangaan. Ang dati-rating makadiyos na kalikasan ng tao ay napalitan ng makasariling kalikasan.

Kabataan, sino ang iyong pakikilingan at susundin? Piliin mong gawin ang tama, huwag ka na sanang magpadala sa pressure na iyong nararanasan.

Huwag nating kalimutan ang isang kasabihan sa Pilipinas – *Habang may buhay ay may pag-asa.*

© 2020

All rights reserved. No part of this material may be reproduced, stored in a retrieval system, or transmitted in any form or by any means except for brief quotations for the purpose of review or comments, without the prior permission of the publisher, Philippine Biblical Worldview Institute.